

ITALIA NOVA

Ita St Italia peninsula, undiq; præterquam ubi alpibus iungitur, mari cincta, ab oriente Adriatico, ab occidente uero & meridie Tyrreno. Sunt illi alpes ueluti insuperabilis murus, & duplex ambiens mare ceu naturales fossæ. Intra hæc munimenta, nobilissima coercetur terra, infinitis penè irrigata amnibus. Hanc Ianus qui & Ogyges ingressus est, quando adhuc erat aurea ætas & iusti homines. Ipse uinum & far primus in Italia docuit, deorum sacrificia & moderatam comestionē. Vnde Fabius pictor: Ianus fuit pontifex religiosus, literatus, philosophus, theologus, pater omnium deorum & hominum, monarcha totius primi generis humani, penes quem unum tunc erat totius uasti orbis custodia. Ab hoc Iano Italia primum appellata fuit Ianicula, sicut & Ianua ciuitas ab ipso nomen accepit, quam hodie Genuam uocant. Hic bifrons pingitur, duas enim facies ante & retro habere dixerunt, quod duo uiderit secula, id scilicet quod præcessit & quod secutum est diluuium. Hic alio nomine Nohe uocatur, primus uini inuētor, unde & Ianus cognominatus est. Est enim נֹחַ in heb. lingua uinum. Huius uxor fuit Estha, cui Romani adijcentes adhuc unam literam fecerunt Vestham, colueruntq; pro dea. Porro Græci heb. uocem mutantes, ex Ianicula fecerunt Oenotriam, sic scilicet Italiam appellant. Fuit & Saturnia à Saturno, & Hesperia ab Hespero appellata. Potiores Italix partes sunt Histria, Gallia togata, Liguria, Tuscia, Umbria, Latium, Campania, Apulia, Calabria & Græcia magna. Sub quibus plurimæ sunt minores regiones, nempe Insularia, Etruria, Aemilia, Flaminia, Lucania, &c.